

Saturday, July 5, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

BORDER TENSION ESCALATES

Tukin khan Zokhawthar bul, Tiau lui kama Khawmawi khuaah Chin National Defence Force (CNDF) leh Chinland Defence Force (CDF) – Hualngoram te an in kap a, thi leh hliam zat hriat theih ni lovin chanchin buatsaih lai thleng hian silai ala ri a ni.

Champhai DC Pu Mohammed Aaquib hnen atanga thu dawn danin Zokhawthar mipui thlamuana, a tul anga hma la turin Champhai atangin Executive Magistrate tirh phei nghal a ni a, Pawl pahnihte hi ramria in sumdawn tawnna an thuhnuai a dah duh vanga inkap an ni tiin thu dawnna chuan a tarlang a, nizan thim hlimah khan pawl pahnihte hi rei lo te an inkap a, mi pahnih in nunna an chan niin thu dawnna chuan a tarlang a, tun dinhmunah inkahna avanga hliam tuar Zokhawthar damdawi in a enkawl turin lak phei an ni a, nizan lam atangin Khawmawi atang hian mi thahnem tak Zokhawtharah an tlanche lut a, tun thlenga lut zat hi hriatfiah theih a ni lo a ni.

(SFX)

Zokhawthar Branch YMA chuan Information Centre atanga mipui hriattirna, ralkhel dar ti riin inkahna avangin Zokhawtharah silaimu thahnem tak a leng phei tih sawiin, mipuite fimkhur tura chahin pawn a chhuak lo turin an hriattir a, hemi hnu hian pawl pahnihte chu Zokhawthar lam hawia an silaite hmetpuak tawh lo tura ngenin, Zokhawthar mipui nun ti ralṭi zawnga Silai an hmetpuak lui zel a nih chuan Zokhawthar a Myanmar atanga raltlan zawng zawngte, Zokhawthar atang Khawmawiah an dah phei vek tur thu Aurinna hmangin an hriattir a ni.

Chin National Defence Force (CNDF) hi Falam lam tualchhung sipai niin Hualngo sipai te hi Chin National Army kaihhruaina hnuaia awm an ni thung.



MP RICHARD

Lok Sabha MP Pu Richard Vanlalmangaiha chuan Mizo te chuan flawmngaina in midang tan thisen an pe thin tih a sawi a, tanpui ngaite tanpui tura flawmngaihna chu chhawm nun zel a duh thu a sawi bawk.

Tukin khan Pu Richard Vanlalmangaiha hian Association for Voluntary Blood Donation (AVBD) hnenah Bus a pe a, mi 12 chuan theihna Bus hi cheng nuai 18 sing 2 leh 2,027 man niin MP Fund atanga pek a ni.

Civil Hospital, Aizawla Model Blood Bank kawta hun hmanah Pu Richard Vanlalmangaiha chuan MP a nih hnuah a Fund atanga program hman hmasa ber a nih thu a sawi a, hna thawh nana tangkai tak ni tura a hriat avangin a ngaipawimawh tih sawiin, kum 1999 Janaury thla atangin India rama Supreme Court chuan man nei a thisen pek a ti tawp a ti a, chumi hnuah hnam dangin thisen pek dan kalhmang an ti danglam a, Mizo te erawh chuan hemi hma hian a thlawna thisen pek an kalpui tawh a, tunah chuan hnam dang pawhin Mizo te kal dan angin an kal ve tawh niin a sawi bawk.

Byte: Pu Richard Vanlalmangaiha

Civil Hospital, Aizawla Senior Medical Superintendent Dr. Lalchhuankimi chuan, kuminah Blood Donation Camp vawi 81 an neih tawh thu a sawi a, January (vawi 10), February (13), March (16), April (15), May (16) leh June (11) an nei tawh a, thisen an lakkhawm te chu sorkar damdawi in bakah mimal damdawi in hrang hrang ten an lachhawng leh thin, a ti.

Byte: Dr. Lalchhuankimi

Bus hlanna hunah hian AVBD President Pu C. Lalnunnema pawhin thu sawiin, Mizoramah tlawmngai pawl leh kohhran thalai pawl hrang hrang ten thisen an pe nasa tih a sawi a, mimal zingah pawh thahnem ngai taka epe thin a awm a, midang tan malsawmna an ni, a ti bawk.



CKTP

Mizoram Synod hnuaia Kristian Thalai Pawl zingah nikum khan biakin hawnga innei mi 1577 an awm a, za zela 46.53% niin hmun danga innei 1812 an awm thung.

Central KTP tarlan danin nikuma innei 3389 zingah hian hmun danga innei an tam zawk a, tun hnai kum 5 chhungah pawh hmun danga innei tam zawk vekin kum 2023 khan Innei 3460 awmin Biak In hawnga innei za zela 44.54% an awm a, Hmun danga innei za zela 55.46% an awm thung a ni. Kum 2022-a innei 3839 zingah Biak In hawng za zela 47.41% an awm a, Hmun danga innei za zela 54.00% awmin kum 2021 ah Innei 3836 zingah Biak In hawng za zela 47.31% awmin Hmun danga innei za zela 52.69% an awm a, kum 2020 khan innei 3682 awmin Biak In hawng za zela 44.30% an awm a, Hmun danga innei za zela 55.70% an awm thung a ni.

Central KTP tarlan danin kum 1990 atanga nikum 2024 inkarah za zela 39.83 % Biak In hawnga innei an awm laiin hmun danga innei za zela 60.21% an awm thung a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.

